

**Siunnersuut uunga: Inuutissarsiutinik ilinniartitsinerit aamma inuutissarsiutinik  
ilinniartitsinerup iluani pikkorissaanerit pillugit Inatsisartut inatsisaat**  
(Kultureqarnermut, Ilinniartitaanermut, Ilisimatunarnermut Ilageeqarnermullu Naalakkersuisoq)

## Saqquummiussissut

### Siullermeerneqarnera

Matumuuna Naalakkersuisut sinnerlugit Inuutissarsiutinik ilinniartitsinerit aamma inuutissarsiutinik ilinniartitsinerup iluani pikkorissaanerit pillugit Inatsisartut inatsisissaattut siunnersuut saqqummiutissavara.

Inatsisisstatut siunnersuutip aallaavigaa, ilinniartitaaneq pillugu suliniuteqarnerup suli annertunerusumik suliniuteqarfingeqarnissaanik kissaateqarneq, suliniuteqarnerup pingarnerpaamik siunertarisaa suli tassaalluni, sulisorisat 2/3-iisa 2020-mi ilinniagaqarsimasuulersimissaat, tamannami Nunatsinni inuiaqatigiit atorfissaqartippaat. Siunnersuut saqqummiunneqarpoq ilinniartitaaneq pillugu immikkut ittumik suliniuteqarnerup ilaatu.

Ilutigisaanik siunnersuutikkut siuniunneqarpoq, unamminartut annertuut ukiuni makkunani Nunatsinni inuiaqatigiit inuutissarsiutit nutaarpassuit suliniutillu annertooruujussuit saqqumertiternerisigut unammilligassariligaat naaperiarnissaat. Tamakku aluminiummimiit, uuliamik ujarlernermiit, aatsitassalerinermiit qaarusuliornermiillu assersuutigalugu takornariaqartitsinermut tunngasuupput, tamatumalu aaqqissuulluakkamik ilinniartitsinernik pilersaarusiornissaq pisariaqalersippaa inuutissarsiutinik ilinniartitsinerup iluani sulisartut inuutissarsiutinillu ingerlatsisut sinnisaannik peqataaffigineqartussamik, taakkumi suliassamik kivitsisussaapput.

Tamatumunnga atatillugu qitiusumik ilinniarfiit qitiulluinnartumik inissisimapput. Taamaammat siunnersuutip siunertaraa ilinniarfiit taakkua unamminartut piumasaqaatillu inuiaqatigiinni allangngoriartortuni naapinnissaannut sakkuissaannik pisariaqartunik pilersornissaat. Ilutigisaanik ilinniarfiit namminneerlutik akissussaaffik annertunerusoq tigusinnaasariaqarpaat namminneerlutillu ineriaortermik pilersitsillutik, allannguutini periarfissat nukissallu atorluarnissaannut naleeqiussillutik inuutissarsiutinillu ilinniartitsinermi ataatsimoortumik neqeroorutit qularnaarnissaat siunertaralugu, nuna tamakkerlugu nunallu immikkoortuini pisariaqartitanik naaperiaaffiusumik.

Anguniakkat taakku angujumallugit siunnersuutigineqarpoq ilinniarfinni pineqartuni aqtsineq nutaamik aaqqissuunneqassasoq, siulersuisuinik suliamik ilisimasaqarluartunik pisinnaatitaaffilerneqartunik akisussaaffimmillu piviusumik tunineqartunik pilersitsinikkut. Siulersuisut siunnersuutigineqartut Nunatsinni suliffissaqartitsiffinni qitiusumik peqataasunit, Nunatsinni inuiaqatigiit ukiuni makkunani suliassariligaasa suliarineqarnissaannut attuumassuteqartunit, ilasortaaffigineqarnissaat qularnaarneqassaaq.

Tamatuma ilinniartitsinikkut ilusiliineq ineriertorfiusinnaasoq, qaqugukkulluunniit Nunatsinni inuaqatigiit pisariaqartitaannut naapertuuttoq, qularnaassavaa. Ilutigisaanik aqutsinermik aaqqissuussinerup nutaap suliassaraa, ilinniarfiit angusassaannik aqutsinissaq suliamut atatillugu anguniakkat aamma imaritaasunut pitsaassutsimullu piumasaqaatit aqqutigalugit, taamatullu qularnaarneqassaaq ilinniarfiit ingerlatsinerisa pitsaanerpaanik sinaakkuteqarnissaat, ilinniarfiit ingerlaavarfiusut aamma suliamut tunngasutigut aningaasaqarnikkullu imminnut napatissinnaasut, Nunatsinnilu suliffissaqartitsiffiit pisariaqartitaannut ilinniakkanik naleqqussaasinnaasut qularnaarnissaat siunertalarugu.

Aammattaaq ilinniarfiit ilinniakkanik neqeroorutit inuutissarsiutinut nutaanut sammisut saqqummiussinnaasariaqarpaat, aamma inuuusuttunik utoqqaanerusunillu amerlanernik ilinniarnissamut kajumilersitsisinnaasunik, Nunatsinni suliffissaqartitsiniarnermut attuumassuteqartut qanimat suleqatigalugit. Tamanna anguneqassappat pisariaqarpooq suliffissaqartitsiniarnermi peqataasut ilinniartitsinerit pilersaarusiornernut annertunerusumik peqataatinnissaat, taamaalluni qitiusumik ilinniarfiit annerusumik tassaaleqqullugit suliffissaqartitsiffiit ilaat, taamaaliornikkullu ilinniartitsinerit pisariaqartitsinermik annertunerusumik aallaaveqalissapput.

Siunnersuutip isumagaa ilinniarfiit nalinginnaasumik nakkutigineqarnerisa Namminersorlutik Oqartussat ataanni inisisimaannarnissaat, taamatullu Namminersorlutik Oqartussat pingaernerusutigut anguniakkanik sinaakkutissanillu politikkikkut aalajangersaajuassapput, ilinniakkanullu naleqqiullugu akuersisarneq pitsaassutsimillu qularnaarineq ingerlattuassallugit. Saniatigut ilinniarfiit Namminersorlutik Oqartussat aningaasartutissanik isertitassanillu missingersersuusiortarneq, naatsorsuuserineq, akissarsiatigut atorfinitstaanermilu atugassarititat pillugit malittarisassaasa ataanniittuassapput, taamatullu aningaasaliisarnermut tunngasut aningaasanut inatsimmut ilaatitaaajuassallutik.

Aammattaaq oqaatigineqassaaq, siusinnerusukkut inatsimmik allannguisarnerit pissutigalugit siunnersuut ataatsimoortumik siunnersuutitut nutaatut ilusilerneqartoq, naak siunnersuummi nutartaasut tassaanerugaluartut siunnersuummi kapitali 6-imik aalajangersakkat qitiusumik ilinniarfinnut tunngasut. Tamanna pissuteqarpooq, inuutissarsiornernut ilinniartitsinermut tunngassuteqartut ataatsimut paasisaqrfiginiaraanni pisariaqalissammat peqqussutit assigiinngitsut sisamat imminnut sanilliunnissaat.

Taamatut oqaaseqarlunga siunnersuut Inatsisartunut suliarisassanngortippa.